

Ngeix Hwnj Mauz Cwzdungh

想起毛泽东

—— Geiqniemh Mauz Cwzdungh Doekseng 125 Hopbi

—— 纪念毛泽东诞辰 125 周年

□ Cunch Hihewngh / 钟希增

1. Gamjdoengh Ik Fanh Vunz

Baihdoeng daengngoenz nding
Rumzcin raeujrubrub
Doengho mbaw mwncup
Va baenz yup angjhai

Ngeix mwngz Mauz Cwzdungh
Gamjdoengh ik fanh vunz
Mwngz goenglauz daemx mbwn
Lij daengh vunz gwn hoj

Ranz miz daemz miz naz
Mwngz cix ca ok rog
Bae biengj fwj biengj mok
Veq sok roen hawj vunz

Caux guh aen biengz moq
Dwgrengz rox geijlai
Mwngz nyaengqnyat daengz dai
Vih vunzlai gouz fuk

Fugsach gyoengq lwgminz
Mwngz cienz sim cienz ei
Nyaengqfoedfoed baenz sei
Mbouj ndaej soeng saek ngoenz

Fugsach hawj daengxcungq
Gungj hwet guh cwzvaiz
Yienghyiengh vih vunzlai
Daengz dai mbouj rox ienq

2. Huznamz Fwj Fanboek

Bi 1893
Huznamz fwj fanboek
Ndwen cibngeih ngeih roek
Mwngz seng doek gwnzbiengz

Gaeq haen coi vunz hwnj
Causanh hwnj daengngoenz
Ciuq diegdeih baihdong
Ciuq cien ndoeng fanh lueg

Laeng ranz goengq bya sang
Naj ranz daemz gvangqyub
Ndi ga roen raemhrub
Byaijhubhub okbae

Roeglwg langh baihrog
Daengzcog rox ak mbin
Mwngz youq Aivanjdingz
Ginglwnh saeh dienyah

Dangdaih boux yinghyungz
Song fwngz yeixvagvag
Dangdaih boux vunzak
Fangzyak lij yiep mwngz

Cangzsah raemx fubfab
Hwnzngoenz hap mbouj dingz
Dahsienghyangh langh sinz
Duzromh mbin gvaengxgvax

3. Ciemq Dieg Laeb Cwng-genz

Ruznding iqetet

Bet baih mbouj dep haenz
Gungcanjdangj laebbaenz
Vunzlai gaen mwngz byaij

Cibsam boux lwgcoz
Hag Ngozgoz gwzming
Banh bya sang dat lingq
Gaij minghyinh guek raeuz

Byaij haeuj dieg doekgungx
Dawz cungq dwk guenbing
Mwngz daiq gyoengq lwgminz
Ngauz ndaej rin bya doengh

Gyoq feiz mbouj hwnjda
Coemh haz dawz ndaej haenq
Ciuhsouh Gijyi hwnj
Gwzming swnj ndaej bae

Nem gyoengqvunz caemciek
Ciemq dieg laeb cwnggenz
Moeb hakdoj seiqhenz
Benz hwnj Cingjganghsanh

4. Mwngz Gaij Loeng Baenq Cingq

Vih Gungcanj Gozci
Daeuj vix doeng yeix sae
Dingj humxhoenx haj baez
Lwed lae ndingmyanxmyanx

Saetbaih deuz couh deuz
Byoengq seiq diuz fungsienq
Lingzvuengz caet ngeih bienq
Vaq yiemj couh gvaqbae

Seiq lengq cungj byaj maenj
Rumz haenq youh fwn roengz
Raen hingzsi mbouj doengz
Mwngz gaij loeng baenq cingq

Gvaq Cizsuij seiq baez
Caez nyinhdingh mwngz ak
Bin bya nae hausak
Byaij boengznyag dieg dumz

Hwnj baihbaek doxhoih
Sam doih bing doxcomz
Giet ndaek ndeu mbouj honz
Mwngz gvai son dauhleix

5. Gap Bing Hoenx Yizbwnj

Yenzanh dieg ndei lai
Bouxgvai couh bae coh
Vihliux gouq guekcoj
Doxcanj bae ra mwngz

Sih'anh saeh bienq gvaq
Mwngz bae vaq bingzningz
Goz-Gung ndaej caemh sim
Gap bing hoenx Yizbwnj

Dingjhoenx youq raeblaeng
Caengzcaengz moeb vunzdig
Mwngz naemjciek daeklig
Vunzdig lau yaek dai

Vwnzyi codanzvei
Ndaej vunz haenh ndawsim
Hengz "song vih fuengcim"
Lwgminz caez yungjhu

Soemh fwnfwn rumzrumz
Vih vunz ciemq haeuj dieg
Hoenx mokmok mekmek
Bet bi cij ndaej hingz

6. Bak Fanh Bing Gvaq Dah

Guekgya caengz baenz yiengh
Beixnuengx gag doxceng
Lumj ciengj noh gwnz heng
Dangq gaeqseng doxdot

Cungzging gyuem mok hau
Mwngz mbouj lau caij haex
Roemxdai yaeng gueksaeh
Gouzmuengh ndaej hozbingz

Vunz mbouj gangj haeujceij
Mok deih laep daengz mbwn
Ciengj Gaisiz sim bwn
Mwngz haenqrengz bae dingj

Mwngz bouxdaeuz ok sing
Bak fanh bing gvaq dah
Biengz gwnzgnwz lajlaj
Geiz haj sing cap rim

7. Mwngz Gvai Gvaq Boux-sien

Guek moq ngamq laebbaenz
Raeuz ndi ngaenz ndi ceij
Guh daeuz mbouj yungzheih
Suenq mwngz ceij dwgrengz

Meijgoz hangz Cauzsensj
Mwngz nyienh ok bing bang
Mbouj goq gyadaej mban
Bang beixnuengx youqgaenj

Yiemz ceih boux dam'aeu
Son raeuz guh vunz soh
Daz raeuz caux ngoenz moq
Bang bouxhoj bouxgungz

Guekgya gag guhcawj
Mbouj hawj vunz yien ndaeng
Dou riengz mwngz baihlaeng
Guh dajndaem dajcauh

Vunz mbouj daeuj famh gou
Dou mbouj bae nyex saeh
Mwngz son vunz gangj leix
Dou neix geiq ndawhoz

Yindu caeg daeuj famh
Suhlenz yamq haeuj din
Mwngz hauz mbouj louzcingz
Dih bing couh bae hoenx

"Song dan aen sing ndeu"
Raeuz eu fwen angqhoh
Mbouj dwg fangzhwnzloq

Guekcoj caen guh baenz

Vwnzgwz roen mbouj soh
Byawz rox mwngz dungx haemz
Haeuxgok caengz ndaej daem
Byawz raen haeuxsan bie

Mwngz daiqlingx gyoengqvunz
Bae caux gwn caux daenj
Doxgiet rengz cij haenq
Maenh'ak gvaq saenzsien

Duzyiuh mbin gvaengxgvax
Yaengx cax haep mbouj lau
Mbin daengz gwnz fwjhau
Mbouj lau duzuguk yak

Mwngz gvai gvaq bouxien
Lijlun cienz ok haij
Veh sam aen seiqgyaiq
Gaij canloz lajbiengz

Meij Suh song guek ak
Hengz yak ciengj guh daeuz
Mwngz yawj byot couh naeuz
Duzguk aeu ceij guh

8. Ciengxlwenx Geiq Ndawsim

Bi 1976
Ndaundei doek roengzma
Dah hung lae raemxda
Roeg bya swenjvagvag

Mwngz yienznaeuz bae gyae
Dou seizseiz geiqniemh
Gingq mwngz sim mbouj bienq
Ciengxlwenx geiq ndawsim

Geiq mwngz yiengh daih'it
Gonj bit ak raiz sei
《Cinyenzcunh·Doek nae》
Lox vunz gyaez vunz maij

Geiq mwngz yiengh daihngaih
Vuenh diendeih vuenh biengz
Gaxgonq boux daeuzyiengz
Dou riengz mwngz haenq guh

Geiq mwngz yiengh daihsam
Hoenx baihnamz baihbaek
Gizgiz laeb goengdaek
Loh bonjsaek yinghyungz

Geiq mwngz yiengh daihseiq
Ceihleix ndei guekgya
Onjw lumj goengq bya
Lengqlengq va caez angj

Geiq mwngz yiengh daihhaj
Dou ngah bit saw mwngz
Lumj mbin fungh foux lungz
Lumj rumz geuj diendeih

